

四庫全書

集部

欽定四庫全書

少室山房集卷六

明 胡應麟 撰

樂府十八首

遠別離

七夕感事作  
用李白體

遠別離古有之不見牽牛星  
熒熒河漢湄黃姑弄杼軸  
錦石為支機招要自成匹  
永永不相疑終朝卧閭闔  
折花事遊嬉逡巡怒上帝  
立遣東西馳天孫尚爾爾  
世人

了可知酌君一杯酒聽我歌別離君不見重瞳墮地氣  
食牛掃除六合朝諸侯美人嬌愛置金屋彭城著繡誇  
遨遊時危勢屈走垓下楚歌四面興仇讐蛾眉倏忽化  
黃土拔山力盡烏江頭君不見隆準布衣奮三尺蹙項  
誅秦四海一淮陰蒞醢百慮空掌上嬌兒夜啼泣迴身  
楚舞涕泗橫黃鵠摩天招不得未央美人居廁中地下  
誰呼寵姬戚古來豪傑流往往稱二子裂眚摧天關五  
岳任驅使徘徊一婦人竟作別離死何況蚩蚩輩疇能

不罹此房帷僅咫尺陷穽如丘山不信別離苦馬知行  
路難荆榛莽閨闥對面生尤愆逝將舍之去去去適荆  
蠻荆蠻非我鄉念欲還長安載歌別離曲使人嘆息摧  
朱顏遠別離何匆匆浮世狹難為容胡不醉我美酒三  
千鍾蒲萄之釀紫花潑綠尊翠杓春溶溶兩手持蟹螯  
拍浮玉缸中落葉有時合明珠有時逢人生把酒當盡  
醉回頭萬事成虛空項劉兩豎子齷齪非英雄天孫與  
河鼓兒女徒忡忡二妃從遊已百歲湘水底事流啼紅

屈原李白俱謾語謔浪分明欺迺公大人虎變挾宇宙  
傍日月駕雙飛龍黃童姹女永相逐周遊八極乘罡風  
安能低眉折腰局促相若棘下駒守樊籠遠別離何勿  
勿安能低眉折腰局促相若棘下駒守樊籠

沈存中云  
二妃從游

之時蓋近百歲詞人率  
以女子侍之非實事也

### 飲馬長城窟

飲馬長城窟長城多白骨白骨縱橫如雪山風吹飛沙  
馬不前借問何人骸暴露置其間云是當時秦王築城

卒被驅什九亡黃泉膏血飼螻蛄肌肉餒烏鳶惟有白骨存  
安能復持還歇馬上長城覩此重辛酸令我中氣咽徘徊不  
能言男兒立功名介冑辭上官橫行萬里外勒勲赴燕然黃  
金絡馬頭白玉飾馬鞭胡不奮長劍平沙漠歛服諸部落勒  
石燕然入長安生封定遠侯冢墓象祁連胡為老死長城下  
白骨支撐玉門闕黃榆翳衰草一望徒漫漫子孫不復知悲  
鳴裂腸肝腸肝痛欲裂子孫無柰何至今長城下白骨年年  
多存亡信有命壯

士悲蹉跎閔彼長城卒聊作長城歌長城歌莫哀秣  
余馬登輪臺輪臺浮雲極天開我馬玄黃以飢飢當時  
班定遠髣髴焦黃埃皓首博侯封慈親溘蒿萊其人至  
今亦白骨定遠之榮安在哉何異長城卒埋胔長城隈  
不如驅我馬舍之歸去來五花一擲換美酒竹林痛飲  
忘疑猜雙眼曹騰向天白飛行八極騎龍媒

登高丘而望遠海和李白

登高丘望遠海海水何茫茫齊州九點渺空闊東西日

月懸扶桑扶桑宮闕連蓬萊白虹照耀中天臺六鰲翮  
屬負圓嶠羣帝百千億萬紛紛跨鶴遊崔嵬嵒大舶  
走徐市安期一去無時回我笑秦王乏靈骨人言漢武  
非仙才登高丘望遠海海水茫茫接天迴使我極目心  
悠哉心悠哉以彷徨何來龍伯人濯足臨扶桑一釣連  
六鰲攬之不盈筐煮鰲為臠充余糧鰲骨如山今已霜  
我醉欲卧黃金牀呼吸靈和挾三光睥睨漢武嗤秦皇  
周行八極還大荒



白紵四時詞四首

東園桃李爭春陽美人如花簇華堂彎弓舞袖褰羅裳  
沈香亭北春茫茫東風吹歌繞畫梁迴眸一盼神飛揚  
我醉欲眠黃金牀

南原日長蝴蝶飛朱樓畫閣臨芳池美人含嬌拂羅衣  
歌喉宛轉浮雲馳流商刻羽知音稀纖腰起舞光陸離  
我醉欲罷黃金卮

西堂雨霜胡鴈來中天皎月瑤雲開纖歌遏雲夜徘徊

美人擊筑秋風哀華陽碣石俱蒿萊荆卿漸離安在哉  
我醉欲上黃金臺

北風蕭蕭撼陵谷白雪飄花滿平陸何處陽春鬪歌曲  
雲錦纏頭舞鸚鵡美人修蛾無疹粟素手垂垂照寒玉  
我醉欲買黃金屋

虎穴行送曹秀才從軍

男兒墮地氣壓鰲俯拾將相如鴻毛時來擁篲掃六合  
雲霞五色飛宮袍君不見蘇秦微時卑貂泣一朝金印

都六國位高金多歸故鄉妻嫂匍匐趨道傍一家骨肉  
尚如此陌上行人誰家子丈夫恥作兒女悲世路滔滔  
競青紫酒酣憤歌歌激烈雙眼橫天日星裂便從東海  
批龍鱗更向南山搏虎穴寧能寂寂雞鶩羣燕雀螻蟻  
爭紛紛金盤六博飲美酒匣底芙蓉電光吼來朝揮戈  
大漠北辟易咸陽萬夫走

悲歌行

滔滔百川逝還流夸父逐日不回頭秋風鴻雁春風燕

河東織女西牽牛牽牛織女不相見一似秋鴻與春燕  
人生有錢付酒家何用殷憂涕如霰君不見黃河奔流  
下太行魯陽難返九日光黃金可成腦可補試問秦皇  
與漢武

長相思

長相思久離別單于臺上秋草歇玉帳寒朱旗折三年  
灞陵夢萬古陰山雪邊笳日暮起塞門流水無聲隴雲  
咽長相思久離別

長相思路行難玉闌鴻雁何時還張霧幄捲雲鬟青燈  
夜未滅翠被曉猶寒荏苒紅顏鏡中空空閨日日望刀  
環長相思路行難

楊白花

楊白花隨風漂泊天之涯深閨無人白日暮金輿玉輦  
空咨嗟惟有舊時楊柳樹月明夜夜啼棲鴉

白鼻騮

逢歡白鼻騮駐妾青絲騎羅帶結同心留連合懽被君

作干將珮儂作莫邪鉤雄雌兩物巧相遇安眠玉匣三千秋

擬李白蜀道難作梁父吟

抱膝南陽廬明時甘陸沈唐堯倦六合飛書入深林潁  
川之水咄嗟不足洗余耳拂衣長嘯直上岱宗之嶽岑  
岱宗高高不得上卧龍之叟來相尋邀余憩梁父重作  
梁父吟我吟梁父君莫猜仰天叱咤浮雲開晏嬰侏儒  
忌賢哲二三力士庸堪哀古來封禪之君七十二其人

一一俱塵埃請為梁父吟我吟君莫猜梁父中天十萬  
八千有餘丈一柱亭亭迴出泰山上磬硤龍從獨立標  
乾坤恍若元氣浮崑崙龜蒙鳬繹以東諸阜盡培塿紛  
紘拜伏羅兒孫決皆斷虹入盪胸明霞屯手接飛鳥度  
步學猿猱蹲竦身十八盤象緯漸可捫黃河一線繞山  
麓但徠矯首勢欲吞鹿盧之蹻搏旋撇捩不遑息神人  
絕頂為我開天門開天門閱仙籍其間似有胡生名謫  
向金華煮白石朝從天門卧夜坐日觀峰峰頭望海色

灝灝連長空五城十二樓  
嵯峨駕天風天雞亂鳴不知  
夕迴飈忽卷大海立海水橫飛十洲溢  
濫濫扶桑吐朝日紅輪輾輾碾太虛  
我欲乘之走八極金銀臺殿咫尺間  
玉女攜余掉臂入掉臂入謁元君呵赤  
蜺導黃麟右拍浮丘肩左顧招廣成神  
農以還九千九百九十有餘帝揚雷掣  
電紛紛跨鶴而來迎烏篆鴻章閎靈蹟  
仲尼捫崖怪難識

管子云古封禪文字萬家仲尼觀之不能盡識

蛟螭缺落孤兔跑

對此撫膺重嘆息翠華茫茫杳何處  
四顧中原日無色



君不見秦祖龍云亭柴望擁列辟衣冠劍舄如雲虹至  
今淪沒盡荒草故物但有當時松君不見漢孝武馳驅  
樂大延文成鹵簿千旄照東魯東方小兒弄乃公寂寞  
荆榛翳坏土吁嗟乎秦皇漢武真蜉蝣我今胡為此滯  
留拂袖行歌下梁父下山竟作齊東遊齊東道上逢李  
白飛揚跋扈心神投鷗鷺之裘五花馬一醉五月眠高  
樓吳鉤如霜雪花落縱橫眼底無全牛我歌梁父屬爾  
和遙空立降雙青虬世人拍手笑輕薄我嗤人世真纍

囚渭濱老叟太多事行年八十圖封侯鄙哉齊國三賢  
子沾沾一果同獼猴力排南山軀九尺殺身反墮侏儒  
儔隆中釋耒大星殞人間事事當回頭頭上青絲一朝  
倏爾變白髮九州之伯四岳之長如懸疣梁父吟歌莫  
愁男兒有身睥睨六合追巢由不然淋漓大白掃椽筆  
陽春百代鳴天球猶勝古來封禪之君七十二伐功詡  
德誇蚩尤君不見七十二家文字總頑石漢碣秦碑半  
頽泐惟有青蓮居士梁父吟萬古長懸岱宗日惟有青

蓮居士梁父吟萬古長懸岱宗日

將進酒

將進酒乘飛龍滿引大白噓長虹舜百石堯千鍾北斗  
奉杓南斗從天瓢出沆瀣大樂鳴笙鏞綃衣萬玉女綠  
髮雙仙童左拍浮丘肩側睨容成公百年三萬六千日  
一日不醉令我行步如龍鍾君不見泗上亭長隆準公  
斬蛇逐鹿驅羣雄鴻門高會割巴蜀肝腸鬱鬱長思東  
結約五諸侯伐楚彭城宮一朝項氏自東至五十六萬

如飄風滎陽匍匐作降虜何如飲酒來新豐信陵賓客  
但墟墓古木荒榛穴狐兔平原毛遂骨已灰黃金之館  
生塵埃何如一笑飲美酒白眼橫吞三百杯長安桑落  
名最古山東秋露清且苦麴米雲安遠難得若下吳興  
近堪數世人每病金華甘此酒名高弘正間只今天下  
貴三白積薪後者常居前盛衰好惡若反掌時來不得  
論媼妍太白三閭豈庸俗一醉一醒操行獨醉者騎鯨  
上九天醒者反莖蛟鼉腹劉伶阮籍雙酒狂竹林牛飲

稱高陽當時頗遭俗子罵至今百代垂文章今晨何晨  
夕何夕魚鰲烹熊衆賓集觴行瑟作不暫停玉椀銀缸  
興逾劇三星在簷河漢入扶桑茫茫日東出安得八駿  
搏長風爛醉瑤池三萬日

行路難二首

君不見東家叟昔日容華今老醜君不見西家翁昔時  
豪富今貧窮盛衰美惡反覆掌造化小兒劇罔兩敝車  
羸馬聊自儲蕩意平心恣歡賞人心險阨如山川行路

之難君所諳有酒盈尊肉盈几明日咸陽過趙李  
君不見原上草一夜霜飛淨於掃君不見園中花一朝  
風蕩隨泥沙男兒快意在行樂何用營營逐飛藿白日  
苦短秉燭遊玉碗淋漓恣斟酌人心對面隔九疑行路  
之難君所知速來就我飲斗酒倏忽華顛壯夫醜

東飛伯勞歌

西飛者燕東伯勞華堂錦帳生蓬蒿少年兒郎輕薄子  
棄捐比翼如鴻毛咫尺天孫與河鼓歲歲年年隔銀浦

一朝烏鵲來填橋猶得相逢話辛苦脂車秣馬夜不停  
漂流南北如浮萍當時離別勿復道悲風冉冉來長檠  
機上雙鸞手中線宛轉流黃涕沾面鉛華落盡君不見  
東飛伯勞西飛燕

少室山房集卷六

欽定四庫全書

少室山房集卷七

明 胡應麟 撰

樂府五十五首

長安道

長安開大道佳麗壯秦京帝座懸雙闕皇居控百城重  
關函谷氣夾岸渭川聲冠蓋凌雲度軒車耀日行新豐  
花簇騎上苑樹巢鶯鼓吹元僚第旌旗大將營狹斜何



金史卷之七  
卷七  
處是北里近西清

黃鵠

何處雙黃鵠飛來自大荒聲傳北塞遠影落漢宮長  
露過平樂銜雲入建章誰同二千石萬壽獻君王

雨雪

雨雪霏霏下遙知行路難將軍金甲重戰士鐵衣寒  
落葉邊淮盡飛花度隴殘城南有思婦擁被獨更闌

出塞

隴首雪花飄征人出渭橋長城屯萬騎大磧下雙鵬閃  
月朱旗靜穿雲畫角遙橫行榆塞外一戰靜氛妖

梅花落

何處邊聲切迢迢逐暮笳天山飛雪暗萬樹落梅花度  
漠邊雲斷飄空漢月斜那能遼左客此夜不思家

隴首

九月被羶裘征人上隴頭黃龍懸塞色白馬赴邊愁隴  
坂高無極寒泉咽不流梅花何處折腸斷在朱樓

入塞

九塞燧烟銷將軍罷度遼前軍嚴陣壘大漠靜氛囂  
王勒飛黃靜金戈太白遙塞門歌舞入紅旆暮飄飄

十五盧家女

十五盧家女盈盈勝莫愁冰心持跳脫玉腕撥箜篌  
拾翠游川上流黃寄隴頭生憎雙語燕比翼在青樓

折楊柳

送客瀟陵橋娼樓雪未消當壚年少女十五正嬌嬈  
柳

葉如垂手楊枝似舞腰  
相看不忍別折贈最長條

小垂手

錦帳出紅綃佳人鬪步搖  
纏頭矜稚齒入掌妬纖腰  
帝子迴鸞輅天孫度鵲橋  
莫嫌銀漏短甲煎徹明燒

征婦怨

去年征鉅鹿今歲入盧龍  
玉塞鶯聲斷銀河雁影重  
裁衣猶憶體臨鏡懶窺容  
秋風起昨夜牀下又聞蛩

班婕妤

長門秋已到昭陽懽未終綠苔積永巷黃葉閉深宮啼  
紅祇自惜擣素為誰工惟將舊團扇寂寂對西風

劉生

劉生何慷慨任俠冠東平五侯前筇借千乘下階迎季  
布匿來久陶朱名已成誰言一劇孟能重亞夫營

明妃曲

驄馬載蛾眉明珠出帝畿含顰辭玉闕結恨向金微月  
疑秦地鏡雲憶漢宮衣傳書寄鴻雁一為報龍旂

後明妃曲

出塞涕沾襟遙望陰山陰舊寵漢宮薄新恩邊地深紫  
駟涉長道黃鵠寄哀音千載琵琶曲誰明去住心

董嬌嬈

素手撥箜篌盈盈在畫樓玉釵翹紫燕金盒貯紅虬楚

臺行雨過漢殿乘風遊期門諸俠少無處繫驂駟

紅虬  
脯見

唐小說同昌  
公主傳中

洛陽道

迢迢洛陽道日暮正飛花公子青絲轡王孫白鼻騮騎  
吹金張宅歌鍾趙李家遙傳麗人至偷眼七香車

秦王卷衣

春色醉秦樓秦王夜宴遊鑾輿迴鹵簿鳳管叶箏篴七  
寶流蘇帳千金集翠裘何人最承幸卷贈龍陽侯

銅雀伎

松柏西陵路君王不復遊高臺銅雀暮故苑石麟秋舞  
將羅袖歇歇倚總帷愁浮雲渺天末漳水共悠悠

賦得盈盈樓上女

盈盈樓上女十五正嬋娟  
照膽秦宮鏡含情蜀國絃  
踏青迴綺陌拾翠傍晴川  
輕薄金吾子無勞問少年

少年行

翩翩遊俠客結束自名邦  
過趙黃金百遊秦白壁雙  
鳴鞭中貴避插羽右賢降  
日暮名姬肆飛花撲玉缸

紫驂騮

蹀躞天閑騎曾從大宛來  
懸金當駿市散玉過龍堆  
伏



樅心元壯鳴鞭氣不迴何辭萬里道逐北向輪臺

關山月

絕塞生秋早空閨入夜愁光飛銀闕上影抱玉門流露  
氣溥絲管霜華拂錦裘征夫猶北戍目斷大刀頭

劍俠行

少年學劍術飛身遊汴寥盧雲氣擁龍匣電光搖醉  
呵魯句踐怒罵霍嫖姚夜來風雪猛拂袖灞陵橋

驄馬驅

驄馬千金裝日夕過平康寸心重衡岱片諾迴滄桑白  
屋笑原季青雲輕趙張明朝砍文吏竟夜赤九光

公子行

新開平樂第紅粧簇畫樓驂駟金作埒鸚鵡玉為韉漢  
宮鳴珮入梁園挾彈遊海棠花正發選伎合梁州

俠少曲

鳴鞭白門道新柳正藏鴉七寶裝繇弱千金散狹斜飛  
揚孟公坐調笑季倫家夜夜雙龍氣腰間挂赤霞

邯鄲曲

夜宿邯鄲花朝扳灞陵柳五侯競獻鯖七貴爭持酒巨  
先膠漆契翁伯金石友縱死咸陽宮何負將軍首

夜夜曲

褥隱芙蓉筵開玳瑁頻繡屏朝選伎羅幌夜留賓豔  
曲梁間度纖腰座裡陳漸看銀漏促烏履雜華裯

采蓮曲

桂棹漾沙棠向暮出橫塘羅裙嬌綠水玉腕映紅粧寒

花憐蓋弱折藕愛絲長迴橈弄斜影驚起雙鴛鴦

仙人篇

為李逸人題

飛身下七襄  
驂駕六龍翔  
負局行中夏  
攜壺出大荒  
蓬萊千日酒  
沆瀣萬年漿  
勾漏砂如石  
藍橋玉作霜

愛妾換馬

行雨蛾眉去  
追風駿足來  
金羈沙苑秣  
寶屨畫廊苔  
太息專房豔  
長鳴伏櫪材  
何當效周穆  
駃耳上瑤臺

邯鄲才人嫁為廝養卒婦二首

乍辭鸞輅出迴望鳳墀高幸脫君王難寧忘廝養勞生  
輕慚九葉命薄嘆同蒿尚異烏孫貴窮殫配二毛

新恩偕伉儷舊寵易纍囚飲恨辭金屋含悽下玉樓鳩  
巢元鵲憩魚服暫龍遊不見平陽壻次且擇衛侯

巫山高

陽臺出天半高壓大江湄暮雨連三峽朝雲合九疑猿  
啼青嶂急鳥度翠屏遲莫作峰頭夢魂迷十二時

芳樹

年年舊桃李爛漫帝城陰結實當前殿開花滿上林香  
飛金谷早影墜玉池深一曲山香罷芳菲何處尋

蜀國絃

春風杜宇國千載寄哀音水激巫娥珮山鳴卓女琴銅  
梁朝日豔玉壘暮雲深浣花谿上宅詞人可重尋

邯鄲行

狹斜連錦里垂柳夾香堤綠綺千條潤青絲萬樹齊玉  
鞭騎過馬金距鬪回雞朝日紅粧坐流鶯拂戶啼

豔曲十首

青樓開大道翠館接平陽  
柳拂葳蕤鎖花明玳瑁梁  
合懽年少客新鏤鬱金牀

畫閣青門外朱簾碧水潄  
繡衾描比翼羅帶結同心  
夜求凰意無勞聽玉琴

北陸歌鍾起東郊騎吹旋  
花香長樂外草色未央前  
十萬章臺柳玲瓏拂翠鈿

春光平樂近勝事曲江留  
帝子聯鑣語王孫挾彈遊  
共

邀金犢至藉草大堤頭

金羈連綺陌玉珮照晴沙  
北極元僚第南陽貴主家  
樓臺七十二日暮亂飛花

神女雲為色妖姬雪作歌  
三千迴粉面二八擁青蛾  
咸陽遊冶客趙李日經過

粉黛徵歌伎腰肢鬪舞人  
綠珠金谷豔碧玉玳筵春  
珊瑚十萬樹一一破瓜辰

明眸驕綺繡皓齒粲瓊瑰  
挾瑟燕姬肆吹簫鳳女臺  
巫



山何處是指點片雲來

寶帳連金屋瓊筵弄玉簫  
嬌嬈花作髻靜宛柳為腰  
當歌小垂手爛漫雪花飄

淶水蕩漣漪江南日暮時  
吳姬木蘭棹越女竹枝詞  
惱殺橫塘下紛紛輕薄兒

又六首

金埒貯驂駟銀粧絡馬頭  
相逢狹斜道並倚大長秋  
何用知名姓聯翩入畫樓

博山銀縷細沈水玉壺香後院通韋曲前除接建章名  
姝三百輩月底誦靈光

瑪瑙粧為砌珊瑚聚作林萬錢編馬埒一轡試牛心向  
夕香風動連車爇水沈

乳燕穿朱屋流鶯啄畫簷霧消雲母帳風動水晶簾遮  
莫嫦娥下千花拂彩蟾

朝朝呈翠黛夜夜鬪纖腰枕上偷金合屏前弄玉簫羅  
衣三十院無處覓紅綃

綺樓藏盼盼羅幙貯盈盈霧袂空中舉霓裳月下行相  
看時一笑若箇不傾城

少室山房集卷七

欽定四庫全書

少室山房集卷八

明 胡應麟 撰

樂府六十一首

企喻歌四首

雙鞭鐵柄襠誰家大健兒蛇矛丈八盤上馬捷若飛  
腰間大羽箭豎指百夫力突如飛天鷄萬鳥戢羽翼  
落日平原西射鵬控飛騎九種黑山戎各各相引避

天生健男子何須多結伴獨身取月支降卒三十萬

鉅鹿公主歌

油壁香車向何許玉勒花驄汗紅雨

呵殿縱橫灞陵渚夾岸行人目相語

新封大國鉅鹿主鉅鹿為誰大家女

七夕夜女兒歌四首

儂家白榆樹一年一開花郎如牽牛星一年一來家

不恨懽意薄但願懽情長牽牛與織女一年一成雙

一年但一會一夜一年周猶勝儂兒郎十載客巴州  
都將一年意一夜申繾綣橋畔烏鵲聲天河漸清淺

碧玉歌二首

莫嫌小家女青春正十六新嫁瑯琊王嬌愛比碧玉  
恨無傾城色不敢邀王憐相懼那在貌動體生春妍

桃葉歌二首

可憐王家郎不解事桃葉清晨渡江去日暮忘迎接  
桃花作羅袖桃葉為羅裙何似阿兄驂終日憐此君

懊懷歌二首

翻團黃犢車載懽出城東  
看看白日墮那能不懊懷  
誰家嬌女兒三三復五五  
結伴邀懽行今夜大辛苦

白團扇二首

白團扇含情侍郎來  
不使路傍見  
白團扇懊恨負情儂  
手持不令見

華山畿

華山畿不願生同棲  
但願死同止  
上有雙比翼下有雙

連理

安東平

嚴冬凜烈北風雨霜河大水冰斷絕車航  
客子遠遊夏夏秦越囊無貲糧帶斷裘結  
我有綈袍以遺故人物薄意厚貴稱君身  
微物在機是儂手織千縷一丈三丈一襲  
東平劉生遠持遺郎愿得邀郎早還故鄉

女兒子



木蘭歌聲起兩岸江陵一夜腸欲斷  
估客年年下黃牛巫山十二猿鳴愁

子夜四時歌

大堤三月中垂楊千萬樹郎騎白馬來堤上遙相遇

右春

期懼大堤口遲我采蓮迴向暮南風急蘭橈不敢開

右夏

人言秋日短儂愛秋月光邀郎解衣坐肌膚如雪霜



少室山房集卷八

欽定四庫全書

少室山房集卷九

明 胡應麟 撰

樂府八十首

讀曲歌四首

窓前安石榴花開正見汝百舌枝上啼含情不得語  
園中櫻桃熟朝暮倩人守昨宵摘遺懽累累不盈簞  
懊惱枇杷實核多而肉少不療腹中饑那禁眼中飽

郎遺佛手柑馨香動彌月報郎紅荳子相思永無歇

秋閨曲二首

八月秋風起榆關正雪花何因吹妾夢萬里到龍沙  
日把金錢卜征人尚未還龍城五千里目斷望夫山

子夜歌四首

開門得懽書有魚長尺一不知溪頭鯉認作潭中鰕  
子度饒芳香子都好容髻觸目俱可憐身今阿誰近  
懊恨負情儂薄于下秋葉持刀截亂絲肝腸中半裂

不乘估客舟不知估客樂十萬荊州娘紅粧照羅幙

大道曲

翠袖紫羅襦胡牀坐明玉相逢謝鎮西邀作大道曲

前溪歌

春蠶挂門口抱絲向牀前鏡昏不見面施朱紅可憐

自君之出矣

自君之出矣鸞鏡黯無光不嫌紅粉污持底試新粧

嬌女詩

莫愁年少女十五嫁盧家雕梁雙紫燕白日坐飛花

江陵女

女郎大堤游顧影各言好相逢平樂兒班荆坐芳草

黃鵠歌二首

黃鵠參天飛高高上寥廓遊戲青雲中那能顧燕雀

黃鵠參天飛九萬忽如馳當時戢羽翼燕雀那得知

石城曲二首

踏青無限好江頭二三月恨殺潯陽風吹郎下三峽

迎懼不下堂送懼不出戶生憎揚子潮隨郎過瓜步

清溪小姑

小姑青溪曲大姑赤山磯獨處誰相依

白石郎

儂居清溪郎居白石途中相遇宛若舊識

采蓮曲四首

采蓮復采蓮搖蕩木蘭船日暮湖頭雨羅裙色倍鮮  
儂棹湖心舟郎來湖北岸笑指雙鴛鴦戲擲黃金彈



荷葉如儂衣荷花似儂面艤棹向中流懽來倩誰辨  
昨夜芙蓉花綠堤一時發清波照玉腕下有雙羅襪

出塞曲五首

大獵漁陽罷椎牛上谷營酒闌飛騎去夜奪受降城  
日暮寒風起長城雪夜飛一軍齊逐北二鼓過金微  
拔劍追強敵黃塵際碧天固原風雨黑前隊縛呼延  
漢壁風烟靜霜天帳幕低雙鷗何處落大磧五原西  
畫角霜天下轅門徹夜開梅花飛不盡月色滿輪臺



少室山房集卷八

欽定四庫全書

少室山房集卷九

明 胡應麟 撰

樂府八十首

讀曲歌四首

窓前安石榴花開正見汝百舌枝上啼含情不得語  
園中櫻桃熟朝暮倩人守昨宵摘遺懽累累不盈簞  
懊惱枇杷實核多而肉少不療腹中饑那禁眼中飽

郎遺佛手柑馨香動彌月報郎紅荳子相思永無歇

秋閨曲二首

八月秋風起榆闌正雪花何因吹妾夢萬里到龍沙  
日把金錢卜征人尚未還龍城五千里目斷望夫山

子夜歌四首

開門得懽書有魚長尺一不知溪頭鯉認作潭中鯽  
子度饒芳香子都好容髻觸目俱可憐身今阿誰近  
懊恨負情儂薄于下秋葉持刀截亂絲肝腸中半裂

燈前驟相見含情不敢道乍可要郎眠那能就郎抱

丁都護

徙倚木蘭花流光莫虛度人命無百年聽唱丁都護

明下童

誰家少兒郎綠絲作單袴白馬紫游韁蹀躞長干路

歡聞變歌二首

青梅繞樹頭若箇不作酸君行有兩意莫戀故所歡

十月芙蓉花九月楊柳樹那得男兒心長若初相遇

楊叛兒

可憐白門柳依依二三月一曲楊叛兒飛花亂如雪

江南樂

舉頭見歡來迴橈蔽蓮葉不知湖心娘濕透雙羅襪

幽州馬行客歌

惱殺燕臺騶發足千里遠只解馱郎行不解送郎轉

阿子歌

阿子住東鄰自矜好顏色春風動羅帷半夜邀歡入

湖就姑

大姑住湖口便風渡潯陽小姑住湖心月明就彭郎

上聲歌

春蠶空有絲不解雙雙眠垂楊空有絲不綰別離船

折楊柳

恨殺城南柳絲絲管離別殷勤折贈君記取豔陽月

越城曲

磯頭日浣紗春波瀉明玉指點苧羅村儂家在山麓



春江行

一夜春江漲江頭浪拍天中流便風起持底挽郎船

雙行纏

繡作雙行纏步步嬌春陽那知羅襪中兩足如秋霜

隴頭歌五首

塵起玉門關  
琱弓馬上彎  
身隨漢飛將  
乘月奪天山  
番人吹箏箴  
漢女撥琵琶  
征人三十萬  
若箇不思家  
絕塞少人行  
蕭蕭過雁鳴  
征衣猶未寄  
大雪滿龍城

欲寄征人信難禁玉筍啼惟應紙上淚點滴到遼西  
空閨一枕夢杳杳邊頭去雙彎不出門也到黃花戍

從軍五更轉五首

一更邊月上流影照長城營門擊刁斗萬隊寂無聲  
二更邊月高戰士攬征袍何時封定遠霜露濕弓刀  
三更邊月斜戍客夜思家瓜期殊未及腸斷聽悲笳  
四更邊月隱征人夢初醒恨殺城南婦流光伴孤枕  
五更邊月落晨起清油幕飛騎奪天山王庭空大漠

長安四時辭四首

攜手七香車春風向狹斜  
燕姬年二八爛醉碧桃花  
太液池邊路輕舟蕩綠荷  
三千漢宮女齊唱采蓮歌  
寂寂霜天下寒砧搗月明  
長安十萬戶一夜盡秋聲  
紅袖炙瑤笙夜醉平原館  
拂曙共鳴珂天街雪花滿

燕京曲

綽約兩青娥一笑遙相遇  
何處問儂家玉河雙柳樹

古意

玉帳結流蘇金鞭照春色二八艷名姝尊前乍相識

俠少行二首

白馬躍金環揚鞭大道間五陵春草色日暮臂鷹還

呼盧夜來家醉眠不知曙忽憶灞陵遊拔刀衝雪去

夜來

用周  
皓事

夜渡娘

翩翩桃葉舟昏黑向江夏那怕狂風吹佳期在梁下

江陵曲

惱懽青絲竿凌晨只欲開狂風趁心起四面石尤來

石尤

非打頭風余有  
辨見丹鉛新錄

映江曲

夾岸千桃花紅暈雙蛾綠惱殺冶遊兒絲鞭映江曲

青陽度

金犢遊東郊玉驄返西路相逢無一言脉脉青陽度

長樂佳

深宮闔百草嬉遊共春日蝴蝶雙飛來故上搔頭立

白符鳩

以我雙碧桃係懽雙紫騮相逢那得去聽唱白符鳩

同生曲

妾貌嬌如花郎顏粲如玉妾年方二八郎年正十六

來羅

池上雙鴛鴦釵頭孤鳳凰雙飛太無賴孤宿鬪誰強

拔蒲

拔蒲復拔蒲六月湖水中纖纖十春筍不肯露青葱

孟珠

誇他孟珠富却笑陶朱貧西施老歸越空作苧羅顰

黃淡思

今生作女郎萬恨攢眉頭來生作兒郎饑餓亦自由

白頭吟四首

巴江九曲流不似兒郎心蜀魄千年啼是儂白頭吟

大車乘駟馬揚揚漢天使不記當壚日辛苦臨邛肆

箱中擯鼻硯碎破不堪著迴身擲向郎將心自摸索

當日臨邛妻今朝茂陵妾金莖半勺露那能救消渴

長史變二首

懊惱爺娘痴貪他門戶熱措大作官人兒命薄于葉  
寧作中人婦莫作上官妻風波起平地山岳移東西

捉搦歌四首

爺娘養女兒但教學鍼線許嫁前溪郎十五不相見  
采桑南陌頭田間日來往傍人指笑儂夫婿漸成長  
阿母教女兒殷勤候姑眠女兒問阿母若為得懽怜



十四嫁官人抱衾作小妻終朝大婦罵眼淚洗面啼

采桑渡二首

不采陌上桑蠶在筐中饑欲采陌上桑使君道傍嬉  
采桑作羅綺總為他人忙不見長干娼一曲衣盈箱

雀勞利二首

禾傍雀啄啄日暮不得飽人生無百年別家太草草  
丈夫各有志不作籠中雞朝歌猛虎吟暮從野雀棲

白銅鞮

郭郎巾折角  
孟嘉帽頻落  
底似山翁醉  
接羅翻轉著

烏夜啼二首

期懽中夜來  
月光滿庭柱  
展轉天欲明  
烏啼石城樹  
匆匆金犢車  
上路正天曉  
不恨懽來遲  
但恨歡去早

趙瑟曲

輕盈窈窕邯鄲姬  
挾琴鳴弦聲乍希  
梁塵拂空霜霰飛  
霜霰飛雲霧集  
月西沈日東出

秦箏曲

呼盧一擲百萬強妖姬如花出咸陽  
箏聲嘹唳夜何長  
夜何長管絃列過流雲弄華月

江南弄

秋江日暮天無雲  
蘭舟桂楫何紛紛  
美人如花簇羅裙  
簇羅裙鬪玉腕  
歌采菱歸去晚

龍笛曲

楚山修竹雲團欒  
伶倫截管飛青鸞  
美人一曲凭雕闌  
凭雕闌弄纖手  
落梅花折楊柳

鳳笙曲

紅爐熾炭玉筦驕誰其吹者王子喬羽衣玉氅行逍遙  
行逍遙聽仙樂萬桃花兩玄鶴

烏棲曲五首

步障華燈光照屋簷如輕雲色如玉白馬金環遊狹斜  
楊柳啼鳥來妾家

鬱金為堂玳瑁梁牀上流蘇百合香同心寶帶合歡結  
攜手邀郎拜明月

錦幔銀屏張五采華堂宿霧籠香靄此時心意兩相憐  
含嬌顧影不自前

疊股釵橫金鳳凰連環交結雙鴛鴦啼鳥啞啞楚天曙  
荏苒容華逐郎去

玳筵張燭三星低羅襟繡褥怯分攜郎騎白馬去關西  
鳳凰臺前烏夜啼

少室山房集卷九

欽定四庫全書

少室山房集卷十

明 胡應麟 撰

樂府七十四首

塞上曲八首

白草連天大漠秋  
千家鐃吹古梁州  
飛霜為洗燕然石  
上客新從定遠侯

紫電花驄白玉鞭  
遠從都護出居延  
清秋不辨龍城色

一片黃雲瀚海前

接天烽火照平盧  
昨夜單于獵上都  
十萬征人明月裡

一時齊挽繡螭弧

絕磧霜飛塞草空  
燕支晴色亂雲中  
將軍醉擁吳鉤出

萬里霜天照白虹

塚上明妃草色青  
征人立馬問龍庭  
西風片月秦城下

愁絕胡笳幾處聽

平沙一望隴雲開  
玉笛飛聲夜轉哀  
萬里朔風吹不斷

梅花齊落李陵臺

戰馬驕騰大漠間  
遙看敵騎薄陰山  
橫戈不待嫖姚令  
靜掃邊塵入漢關

邊烽不動邊塵收  
刁斗無聲夜色流  
醉殺歌姬油幕底  
霜天遙按小涼州

春宮曲四首

昨夜春風拂苑牆  
三千南內鬪紅粧  
朝來鳳輦花前過  
報道君王入上陽



殘雪初消太液前御溝晴日柳如煙披香殿上承恩早  
千縷黃金拂御筵

長門花滿月華高雲鎖珠簾護碧桃夜靜南宮歌吹發  
新聲遙奏鬱輪袍

玉階草色上窓紗深鎖歲華隔翠華添罷晚粧無一事  
白櫻桃下試琵琶

秋宮詞

梧桐飛葉下銀牀腸斷秋聲玉漏長三十六宮明月裏

夜聽絃管出朝陽

少年行五首

匣底雙龍斗色流  
長安道上紫驂騮  
燕姬二八彈箏坐  
千樹垂楊拂酒樓

平康歸路欲黃昏  
下馬青蛾白玉尊  
一曲菱歌揮袂去  
月明裝束候期門

五陵樓殿雪初消  
玉勒翩翩意氣驕  
落日萬家春草外  
呼鷹遙過灞陵橋

甲第新開上苑邊  
滿堂花色照嬋娟  
醉攜如意堦前舞  
七尺珊瑚碎畫筵

調鞭徐傍夕陽亭  
繡簾雕弧架雁翎  
夾路萬人齊指處  
碧天遙墮海東青

劍客行

雙丸耳畔雪花明  
九陌長安任意行  
片語樓中無處覓  
夜飛龍蹻入青城

遊仙詞十首

玉檢金泥柱下藏書成函谷  
輓徜徉流沙一望三千里  
還跨青牛出大荒

玄圃明霞望不窮金銀樓殿碧天中  
春風似識周王面  
乍夜蟠桃萬樹紅

百辟衣冠照鼎湖軒轅臺殿夕陽孤  
雲間獨跨雙龍背  
萬頃天風墮鹿盧

七步文章煥斗牛遮須聊作御風遊  
狂揮大筆天河畔  
題遍瑤京十二樓

羽蓋如雲下夕陽俱言浮海謁東皇麻姑夜擘紅虬脯  
指爪偷看一尺長

采石船頭月濺衣長鯨高擘絳霞飛安期一見如相識  
指點蓬萊萬玉妃

洞裏青霞照玉盤飛星羣灑石門寒桃花五報西池發  
可奈峰頭局未殘

縹緲飛梁駕赤城漫勞司馬問初平金泥玉版長生籍  
同向丹臺列姓名

少室峰高接絳河千秋詞客鬪嵯峨誰言不是靈仙骨  
遙夜天姝出大羅

海上朱明碧霧流五仙同跨五羊遊何如野客金華洞  
卧領羣羊十萬頭

雲龍引

芒碭秋空映赭袍龍光雲氣與天高五湖何處無明月  
斫竹南山坐釣鰲

後采蓮曲二首

畫舫青絲蕩綠油羅裙玉腕坐中流  
生來菡萏元同蒂  
若箇芙蓉不並頭

湖心濤浪拍天流  
湖上王孫挾彈遊  
一派蓮歌何處起  
大堤齊控紫驂騮

明妃曲

目斷長安漢使來  
五雲何處是蓬萊  
龍沙月色三千里  
獨抱琵琶上紫臺

涼州詞

靜夜流雲拂畫檐微風不動水晶簾紅牙拍按瑤臺上  
古調初翻昔昔鹽

伊州曲

碧天如水暮雲收明月平鋪翡翠樓樓上美人三十六  
夜彈瑤瑟唱伊州

橫江詞二首

結束腰肢賽水神沙棠舟楫往來頻江風日暮連天起  
愁殺西陵破浪人



揚子江頭風色狂白波如山五丈強自是吳姬慣迎客  
來來去去木蘭航

從軍行五首

大漠秋風吹鐵衣長城明月滿征旗捷書飛奏明光殿  
乍夜前軍獲郅支

九月邊頭朔氣殘賀蘭山北望長安殷勤去鴈傳消息  
欲寄征衣趁早寒

寥天霜色暮淒淒無定河邊落日低欲問輪臺前去路

黃雲白草遍遼西

吹笛關山月半痕  
梅花無數落轅門  
不知何處旄頭現  
一夜漁陽萬騎屯

白馬將軍慣渡遼  
笑提金勒掃氛囂  
五千劍客當前隊  
盡歛名王入漢朝

北院詞八首

紫燕雙飛拂畫梁  
雕甍百尺隱垂楊  
東華門外諸年少  
攜手先過白玉堂

西第千門簇五侯御溝春水逐人流  
采恩爛漫黃金色  
遙指梳粧近妾樓

金水橋邊一百家家簾幙護桃花  
青衣日暮濃粧出  
指點蕭郎白鼻騮

珠簾不動控銀鈎內苑春光入畫樓  
深夜月明絃管沸  
露桃花下合梁州

雙雙羅襪鬪凌波兩兩沙棠泛玉河  
日暮大堤流水急  
迴橈齊唱采蓮歌

別開金屋倚岩堯白玉河邊第二橋  
夾岸紫騮三十騎  
花時齊過董嬌嬈

綺陌東頭接上陽  
娉婷年少舞霓裳  
怪來香閣時常閉  
盡日濃粧對海棠

靈濟宮前翠幙懸  
平康門巷百花連  
西園公子攜賓過  
十六青娥舞玳筵

南院詞八首

浮雲樓觀接蓬萊  
五岳三山大內開  
昨夜春風城外過

千花齊發鳳凰臺

公子連翩挾彈遊垂楊偏拂紫驂騮長干巷裡三千隊  
若箇新粧是莫愁

紫燕銜泥度夕陽雙飛南陌認雕梁高門不用尋王謝  
盧女新開白玉堂

歡作沈香儂博山雙烟一氣紫霞間千門柳色啼鴉暮  
自喚情人月下攀

桃葉年方十五強春波搖蕩木蘭航不知何事歸來晚

狂殺王家白面郎

萬戶千門玉作臺  
春風何地不徘徊  
烏衣巷口紅粧亞  
一路歌聲鬪草回

垂楊千樹拂紅塵  
壓酒吳姬動絳唇  
日暮狂風連袂起  
飛花愁殺渡江人

城下春江抱石頭  
秣陵南下是瓜洲  
相邀女伴尋春去  
共擲金錢賽將侯

燕京四時詞四首

帝闕皇居北斗間春風長繞玉門關東郊昨夜桃花發  
一樹先開萬歲山

沈李浮瓜燕玉臺冰山雪谷倚蓬萊珠簾百尺重重下  
不放人間赤日來

千葉從風盡報秋長門團扇迴添愁玉河橋畔東流水  
幾處題紅出御溝

玉宇吹花度栢梁千門飛雪夜茫茫銀笙暗炙紅爐畔  
一曲陽春漏正長

長門怨四首

羅幌飛螢玉露溥珠簾不捲坐更闌  
昭陽月色渾無賴  
才到長門特地寒

鎖閉葳蕤絕履綦宮花猶發萬年枝  
沈香亭北無窮恨  
盡在闌干獨倚時

鳳吹喧傳隔彩霞龍旂搖曳暮雲斜  
預知行幸平陽宅  
不用庭前望翠華

金屋粧成盡日間十年紅粉誤朱顏  
腰肢漫自誇纖細



管領華清是玉環

青樓曲八首

十里秦樓近灞橋  
簫聲何處起  
宮堯珠簾百尺東  
風裏  
雙鳳睽  
翩逐翠翹

粉面三千照玉臺  
期門南去是蓬萊  
金鞭暮過張公子  
一騎潛呼萬乘來

兩槳頻催過石城  
沙棠搖曳畫船明  
莫愁湖上千株柳  
腸斷王孫作隊行

一樹含桃鎖曲房金籠鸚鵡喚斜陽  
霍家娘子新粧罷  
擁髻來迎李十郎

蘇小粧樓隔畫橋湧金門外半蘭橈  
相攜女伴巫山去  
昨夜錢塘正上潮

指點平康宿暮鴉粧臺紅粉簇明霞  
曲江筵上諸先輩  
躍馬爭尋阿潤家

二八青衣彩袖懸相逢如夢畫堂前  
無端錦瑟撩春思  
歷亂東風五十絃

銀牀梧葉墮高秋良夜吹簫憶舊遊二十四橋天似水

畫船乘月下揚州

少室山房集卷十

欽定四庫全書

少室山房集卷十一

明 胡應麟 撰

五言古詩五十四首

擬古十九首 有序

不佞垂髫談藝即耽嗜東西二京憶操翰之  
初賦詩送人之白下起句云悲風號枯桑吹  
墮林上月客子將遠行驅車中夜發一時名

流驟加賞嘆以厯塊期之弱冠從家大人入  
長安社中酬倡大都五七言律亡暇古風比  
歲巖居始克以佔畢餘工稍稍從事嘗擬作  
古十九首束裝北上染指輒休乍過婁江請  
益王長公長公拳拳進余努力茲道適長夏  
閉關因檢拾舊草點綴聯絡竟成此章并士  
衡所擬蘭若生春陽為二十首古詩絕唱世  
以為白雪陽春不當擬議迺昔人每云取法

乎上僅得其中則自三百篇而下當法孰先  
國朝仲默于鱗咸有斯作兩家得失集中具  
見余之擬此聊為異時印証之自若曰優益  
抵掌非余所能知矣

嚴霜結重陰歲序忽已暮念子當遠遊抗手即行路  
路行常苦遠客歸嘗苦晚浮雲蔽關塞白日不可挽昔為  
婚與姻今為越與秦落葉隨飄風飛鴻辭故羣君心豈  
難保妾顏匪長好登高望平原四顧盡衰草相思無朝

夕沈憂令人老願為雙車輪隨君萬里道

鬱鬱城東門盈盈桃與李抽條仲春月穠艷若羅綺軒  
車競采掇日暮未言止如何秋風生搖落自茲始寄語  
青樓倡盛顏難久恃

清晨策駕馬整轡南山隅遙望長安城飛觀百尺餘  
我青雲端甲第羅長衢華鏤若流水軒蓋何威紆各騁  
要路津盈盈道中趨人生若飛藿奄忽隨丘墟盛衰各  
有極貴賤同斯須何如命我友斗酒鳴笙竽逍遙放情

志卒歲聊自娛

令節懷嘉賓親友四面會軒車若雲屯高談盡冠蓋旨  
酒羅長筵新聲動環珮秦箏響未畢楚袖盈庭內同心  
競酬酢羽觴互更代各言行樂殊少壯不相待勞生徇  
榮華日月忽已邁千秋萬世盡賢聖亦馬在

綺樓亘中天窈窕百餘尺飛甍架複道藻井縱橫出上  
有雙蛾眉容華世無匹臨風發皓齒當戶理瑤瑟新聲  
入雲漢四座咸動色行人競傾聽日暮不遑息但覩來



者惟誰明居者臆盛年處空閨中夜起悽惻

采采叢蘭花美人隔江沚褰裳涉其波舟楫誰為理迴  
風動羅裳日暮聊徙倚安得雙鴛鴦銜致篋中綺

客遊異鄉縣終歲懷苦辛憂思起長夜展轉不得晨舉  
頭望河漢悵彼參與辰疇昔同盟友金石偕交親飛飛  
振六翮棄我若途人我欲東歸洛日暮河無津徘徊入  
房中涕淚沾衣巾

彼美東鄰子習禮明書詩十五登君堂新婚諧結褵願

為雙飛鴻百歲不相離風波起中路忽去天一涯不惜  
去日遠但恐懼愛移黃塵蔽關塞會合無前期願君策  
高足努力趨明時生當聚華堂死當長別離

灼灼芳樹枝敷榮一何早綠條被繁英初日何杲杲感  
此芳春時采掇寄遠道馨香不終夕零落隨百草盛年  
處空閨顏色為誰好

嚴霜瘁百草節序忽復易噉噉雙飛雁雲中各自適念  
我同衾人索處異南北披衣望天宇衆星何歷歷牽牛

卷十一  
隔河梁織女限東壁徬徨間一水欲往步難即同心復  
異地何異不相識

清晨出大梁遙瞻北邙道野火燒平田白楊半枯槁人  
生寄宇宙忽若原上草去日常苦多來日常苦少少者  
日以壯壯者日趨老幻軀無百年富貴何足保思為魯  
中聖萬世同壽考

高城跨東南大道夷且直青樓間綺疏瞳瞳照初日五  
陵俠少年結束事遊暱白馬飾銀鞍連翩度阡陌美人

遙目成相對理瑤瑟十千輕一笑百萬當一擲為樂願  
及晨為懽願及夕紅顏匪百歲何由保金石

迴車灞原上白日忽將暮石門高崔嵬悲風起長路借  
問何人阡無乃前朝墓人生寄一世奄忽迅朝露荒哉  
秦漢主尋仙起遐慕弱水不可援三山竟焉度玉碗出  
人間徒為赤松誤傷彼泉下人喟焉策蹇步吹竽宴華  
堂娛樂從所務飄飄極心志千載為旦暮

驅車越長道還歸故里間少小客咸陽今來廿載餘親

知半凋落塚墓留村墟松柏儼成行狐兔交路衢門巷  
寂無人誰為問鄰居停車再嘆息日暮長欷吁客行盡  
九州不如守敝廬

浮生若飛蓬寄迹宇宙間萬物皆有盡胡為長苦顏旨  
酒列高臺嘉賓共盤桓夜闌當秉燭日晏當沈酣人生  
無百年譬彼東逝川生者不暫歡死者寧復還

昭昭三五夕皎月流素光徘徊入高樓照我羅衣裳攬  
衣坐嘆息起步仍徬徨良人懷遠遊九載客他鄉空閨

知歲暮獨處知夜長  
嗷嗷雲中雁隨風忽南翔  
安能假羽翼萬里來君傍

凜凜北風至霜雪零前除  
惜哉征人婦歲宴恒寡娛  
夙昔奉衾裯矢志誓不渝  
如何棄我去悠悠長路隅  
思君隔天末邈如秦與越  
歡愛寧復論鉛華為君絕  
君懷如明月妾心如冰雪  
君懷有圓缺妾心徒皎潔

清晨啓重關有客千里至  
手攜尺一書言我故人寄  
長跪問故人客亦無所言  
開緘讀素書宛若覩所歡  
上有

金錯刀下有白玉環明月三五滿故人會當返

仲秋涼氣肅噫噫雁南度北斗倚闌干氣運淒以暮悲  
來撫長劍浩歌起庭戶一為遠方客永別親與故頻夜  
夢室家展轉忽已寤念欲還故鄉按轡遵廣路悠悠大  
河水一葦安可渡

亭亭孤桐樹託根嶧山岑良工琢其枝為我匣中琴膠  
漆相交結珍重逾南金被以朱絲絃彈以白雪吟清音  
順風揚四坐疇同心佳人隔天末日暮涕沾襟

王長公  
云十九

首最難言離之則虞落節前輩俱所不免合之則虞捧  
心于麟亦微用為累足下加之矣唯在更刊鋒巧露其  
本質而已

### 又擬古八首

冉冉歲云暮念君遠別離浮雲蔽原野四顧白日馳夙  
昔幸同衾懽愛誓不移如何百年好去我忽若遺嚴風  
起天末霜雪盈路歧晨起踐關山薄暮長抱饑音微日  
夜隔會合當何時恨無晨風翼並起東南飛

高樓有思婦被服姣且妍橫琴理清曲淥水被幽蘭一



彈浮雲暮再鼓流風旋哀音振林木聽者為忘餐借問  
何人婦感嘆停朱絃征夫越萬里一別歲載遷鉛華坐  
銷歇太息空嬋娟

灼灼園中花盈盈道傍柳敷榮艷陽月攀折佳人手秋  
風一朝至容耀詎能久人生寄天地聚散何不有俛仰  
百歲間倏忽成老醜身名匪金石富貴欲誰守怡我平  
生親獨有盈尊酒

肅肅金風至大火時西流遊子異鄉縣中夜懷百憂驅

車駕言邁奄忽歲已秋登高望故里江漢何悠悠佳人  
在遠道欲濟無輕舟同心日夜隔涕淚縱橫流願為南  
飛翼萬里行相求

朝登北邙山徘徊望陵谷荒墳何纍纍狐兔自相觸白  
楊夾修途黃泉蔽層曲傷彼潛寐人年命一何速生存  
宇宙間行樂苦不足驅車暮歸來鳴箏燕華屋北里揚  
清音南鄰薦新曲親知從我游被御紉與穀相對各盡  
觴良夜更秉燭榮名耀百代轉盼同初旭亮無喬松壽

誰能傷局促

青鳥從南來翩翩隨風翔口銜尺書至乃自大海傍美人三歲別沈憂熱中腸織成機中錦拂拭爛生光下為連理枝上為雙鳳凰致之萬里道聊以充君床願言勗斯義旦夕毋相忘

迴風吹轉蓬倏忽行萬里遊子懷山川驅車暮不止荒郊四無人日入斷行旅熊羆向我啼僮僕為我侶南望見故鄉失路空徙倚眷彼平生親氣結不能語

東鄰有美質，雜珮何繽紛。明眸輝朝日，絕代少其倫。結  
褵為君婦，婉孌日偕親。風波起閨闥，中道成荆榛。君為  
東流水，妾若西路塵。東西各相背，信誓何由聞。紅顏會  
當歇，豈不懷苦辛。願君企高節，賤妾寧復云。

古離別二首

戚戚遠行子，駕言還舊疆。脂車望關塞，願逐晨風翔。主  
人卜清夜，置酒臨高堂。妙伎出閨闥，纖腰移曲房。當筵  
發皓齒，四坐流芬芳。迴飈襲綺戶，飛霜飄長廊。良宵一

何促瑤瑟無輝光征夫念明發握手起徬徨仰視雲中  
雁三五各成行胡為雙飛龍羽翼多參商丈夫志萬里  
會晤安可常勗哉就長路皓首期相望

驅車出郭門徘徊望都邑念我平生親聚散何倉卒白  
露塗中達清霜被原隰驚飈動地起黃葉無寧夕羈禽  
懷故林疲馬倦行役羣雁西南翔哀音正嘹唳豈無盈  
尊酒執手歧路側飛觴屬華筵行子相向立別離在須  
臾沈憂萬端集去去勿復論紅顏中道擲

雜詩四首

明河沒天宇白露晨為霜  
睽彼同心人忽去天一方  
倉皇挈尊酒送子河之梁  
登高望四野川陸浩縱橫  
豈無瑤華音道遠不得將  
攬衣入房戶馳念忽如傷

曜靈薄崦嵫光景忽已夕  
圓兔猶未升明星爛然出  
寒蛩號我前蟋蟀鳴我側  
涼風起庭戶樹木何蕭瑟  
佳人期不來延佇空歎息  
寧知三歲心為子長惻惻

冉冉西馳日悠悠東逝川  
征夫怨長路志士惜盛年  
長

路行當歸盛年不再還寒暑互推移陰陽浩無端淒風  
起簾幙白露中夜溥美人坐高堂投袂起長嘆

窮陰亘晦朔山谷多寒風悲哉客遊子旋足如轉蓬昔  
行屆長夏今來值玄冬悠悠十年內車轍窮寰中人生  
貴適意遙役何憧憧逝將歌考槃岩穴安微躬

寓懷十二首

端居意不適策杖起行遊仙人八公侶攜我昇蓬丘冷  
泠隨風舉衣袂若雲浮放歌崑崙頂下視弱水流天都

信寥廓絳節聊淹留黃金被高館白玉開層樓樂哉瑤池上一飲為千秋

崇蘭處深谷綠葉凌朝陽迴風一披拂百里傳芬芳惜哉叢林下無人知國香  
燼燼桃李樹託根歧路傍飛花落閨闥  
弄影臨華堂詎以盛衰故易此貞素常不見西山老食薇終首陽

飄飄穆天子八駿乘風馳日行三萬里遠道何不之西遊見王母宴飲登蓬池  
千秋蟠桃實萬仞扶桑枝寄言



謝塵世百代同須斯

夷羿射九日共工觸不周龍伯連巨鰲伯鯨湮洪流貪  
嗔起一念乃與造化仇力窮固難繼身滅將誰尤巍巍  
軒轅帝問道崆峒丘唐虞守無為四靈畢來遊

亭亭孤松樹託根徂徠顛高枝翳白日曲榦臨迴川女  
蘿蔚蒙籠風雷爰相纏豈無明堂用物性貴自然一為  
匠石顧斤斧成災患何如鄧林下寂寞全天年

壺丘與天遊列子乘風行飄飄漆園吏九萬凌高冥胡

為末世士多歧日屏營蹻死財利夷齊徇空名寧知  
大道觀不異蝸與螟華胥有逸民去去行相親

弱齡負奇尚雅志誦墳史訪岳懷尚生浮湘慕遷史杖  
策遊中原邂逅二三子裘馬何翩翩招要共生死經過  
漸離輩感激昭王士黃金空崔嵬所願非尺組長揖辭  
諸侯歸耕汶陽浹

彼美傾城子艷色明朝霞寶釵耀金雀充耳珮瓊珈相  
如既西席宋玉仍東家春風起羅袂琴瑟相交加但知

良時樂安覩白壁瑕託身一失所百歲徒咨嗟

昔有夸娥子猛氣雄千兵褰裳逞逸足思欲追曜靈遂  
巡暘谷傍道渴不任行投身死岩穴骨肉盈林垆過澆  
篡夏室莽卓乘炎精人謀豈不殫天命俄已傾寄言雄  
圖者割據徒營營

曰余負奇好夙尚在髫齡禮樂觀百王詩書窮六經言  
乘休明會將致海宇平如何歲年邁依依卧柴荆亮乖  
四方志永希千載名文章亦大業富貴寧重輕勉哉事

著述三代追遺英

丹霞蔽岩谷素雪霏林皋悠悠避世士歲晏守蓬蒿  
箕山既紆鬱首陽何岑崑時偕沮溺侶耦耕向南郊  
大厦匪安居千駟為禍招悲哉路傍子磬折方勞勞

有鳥從東來游戲青雲中朝翔閭風館夕息瑤池宮  
言欲覽德輝來下雙梧桐搖搖荆棘枝鷗臬宅其叢  
所嗜惟腐鼠焉知彼所從踈身奮六合將邁崑崙東

咏史八首

清時厭藜藿挾策干承明肅肅中天宇列宿懸神京衣  
冠萃閭闔謁帝羅羣英如何攀龍客相棄若浮萍長嘯  
出死洛驅車返柴荆升高望八荒濯足臨四溟商山豈  
不貴畏壘豈不榮大哉魯尼父著作垂千齡

鯢魚產溟渤鬚鬣如山丘朝行發碣石暮宿崑崙陬疎  
身激巨浪噴沫飛洪流倏忽化大鵬九萬乘風游翼若  
垂天雲衆羽不敢侔一飛絕五岳再舉凌十州翩翩鸞  
鳩侶榆枋自相求翱翔但咫尺曷覩大化道

飄飄潁中客黃屋若浮雲矯矯嚴陵叟垂竿卧江濱脫  
屣九州長長揖萬乘君棄瓢入深谷舉足動星文英風  
振薄俗勁節凌高旻樊公信獨往周生亦離羣一朝徇  
微祿遺累流千春

世途日紆局達士隨所遭侯生隱抱關朱亥匿鼓刀鼓  
刀實賤役抱關非崇寮煌煌魏公子車騎來招要虛左  
大梁席執轡夷門郊堂中衆賓客錯愕起相嘲寧知救  
趙日叱咤風雲高竊符出中禁奮椎奪前茅偉哉却秦

續百代稱雄豪

虞卿本說客著書自窮愁馬遷下蠶室史筆垂千秋楚  
澤放靈均漆圓餓莊周伊人一何否舉足罹愆尤文章  
實大業寧與富貴謀戔戔金張第七葉開王侯一朝隨  
物化榮耀同蜉蝣

伯夷餓空谷務光沈清泠湯武首征誅白公徇其名嗟  
哉古賢達舉足罹天刑茫茫大造間遺跡若蜚螟升高  
望宇宙攝衣御雲輶追隨廣成子乘化入瑤京九州一

坏土何以勞我精五岳一拳石聊以棲吾形

荆卿卧燕邸屠狗相過從朝為太子客暮出遼城東酣  
歌和漸離壯士髮盡衝前登咸陽殿意氣何其雄左操  
督亢圖右搃秦王胷劍術豈云疎天運良已窮寥寥易  
水上萬古悲寒風

田巴辨稷下緩頰摧千人鄒生館碣石五德何繽紛夸  
夫樂驚世小人恒共羣誰明白馬喻徒擅雕龍勤豈若  
魯連子笑談却秦軍成功不受賞萬乘如浮雲



少室山房集卷十一